



JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL

Aktualizasaun Justisa:

Periodu : Juli 2009

Edisaun : Juli 2009

## AMNESTIA JERAL BA KAZU 1974 – 1999: DEZAFIA BA SISTEMA JUDISIARIU TIMOR LESTE

### ANTESENDENTE

Depois de tinan atus ba atus iha Portugal nia ukun, tuir fali husi Japaun durante segundu guerra mundial no dala ida tan depois de segundu guerra mundial kolonial Portugal koko nafatin atu ukun iha Timor Leste, até tinan 1974, mosu revolusaun dos cravos iha Portugal ne'ebe mos fo anin diak ba rai kolonial Portugal sira hanesan Timor Leste. Timor Leste consegue deklarar independensia maski parte sira dehan katak deklarasaun indenpendensia iha lora 28 de Novembru 1976 hanesan deklarasaun independensia unilateralmente husi partidu marxista nune'e dudu nasaun Indonezia halo invazaun mai teritoriu Timor Leste durante tinan 24.

Luta hodi determina independensia iha presau kolonial no military indonezia hasusar, hakanek tebes no mundu tomak hatene sakrifikasaun husi povu Timor Leste tanba kada familia, no kada ema tantu direita nomos indireita sente violasaun direitus humanus ne'ebe grave no kruel ne'ebe halo husi military Indonesia kontra teritoriu Timor Leste.

Susar tebes ba ema tomak Timor Leste atu haluhan no halakon sentidu injustisa ne'ebe sira sente durante tempu okupasaun, liafuan xave ba povu Timor Leste mak **Justisa** nune'e bele revela lialoos no la hanoin tan atu halo kontra attaka ka ódiu vingansa hodi hakotu sirkumtansia tempu passadu ne'ebe mak nakonu ho traumátiku, nune'e povu Timor Leste bele hateke ba oin hodi priense independensia ne'ebe hetan restora ona ho sentidu alegria.

**Justisa** ne'ebe sai hanesan dezeju husi povu Timor Leste agora, parese hanesan deit esperansa ne'ebe mak sei la realiza tanba lideransa masimu estadu Timor Leste komesa ona hanoin/planu hodi bele fo amnestia jeral ba kriminozu funu nian, atór ba violasaun direitus humanus, krime kontra humanidade mesmu planu ne'e hetan objesaun husi povu tomak tantu ne'e husi ONG, Akadémiku sira, parte igreja nomos vítima rasik, familia vítima husi krime durante tempu okupasaun no invasaun husi Indonesia durante tinan 24<sup>1</sup>.

---

<sup>1</sup> Journal STL edisaun Segunda dia 22 de Juñu 2009: Horta 'Tauk' Temi Tribunal Internacional Gastão Salsinha Besik Livre; Konsensu Diálogo Nacional, Salaun Ministériu Negósiu Estrangeiru, Praia dos Coqueiros, Dili, dia 17 – 19 de Juñu 2009.

Amnestia Jeral ne'ebe mak foka husi lideransa estadu Timor Leste, sei fo ba atór krime, ho razaun katak hakarak hakma'an pezu ne'ebe governu foti liu-liu parte tribunal parese mos tanba ho razaun hakbi'it relasaun diak ho nasaun viziñu mak hanesan prioridade liu sen hare história nakukun husi nasaun ne'ebe durante ne'e hetan violasaun ka krime, tanba hare fali ba kotuk ne'e signifika katak loke fali kanek tuan sira ne'ebe uluk eziste<sup>2</sup>.

JSMP hanoin katak atu foti desizaun hodi fo Amnestia Jeral ne'e la'os buat ida ke fasil, tanba relasiona ho povu Timor Leste tomak ne'ebe mak kleur tebes sai hanesan vítima ba krime durane tempu okupasaun ne'e. Tanba ne'e JSMP sente presiza atu fo opiniaun legal antes estadu realiza dezeju ne'e iha tempu oin mai.

## **SIGNIFIKASAUN AMNESTIA**

Liafuan Amnestia mai husi liafuan Gregu ne'ebe signifika katak "haluhan", nune'e haluhan tiha aksaun no konsidera katak nunca eziste ka akontese aksaun krime ruma. Tanba ne'e, akuzasaun husi tribunal hasoru kazu balun ne'ebe garantidu atu hetan amnestia sempre la hala'o.

Perdaun/Indultu samente bele fo depois de iha julgamentu ba kazu ruma iha tribunal no desizaun ne'e konsidera katak iha ona forsa tanba tama ona iha tranzitu en julgadu. Ninia impaktu mak sei iha liberdade ba ema ruma ne'ebe hetan ona pena sentensa katak nia salan.

Immunitade signifika katak iha immune ou liberdade no ou livre husi sentensa no prosedimentu legal sira seluk. Bai-bain aksaun ne'e foti ba grupus balun ne'ebe hetan privilegiu hanesan lideransa estadu, membru parlamentu, ou ba iha membru diplomata sira durante sira sei hala'o sira nia kna'ar<sup>3</sup>.

## **BAZE LEGAL TIMOR LESTE**

### **(a) Konstituisaun Repúblika Demokrátiku Timor Leste**

#### **Sé mak bele fo Amnestia tuir Konstituisaun Repúblika Demokrátiku Timor Leste?**

Bazeia ba Konstituisaun, Prezidente la iha kompetensia hodi fo Amnestia no la iha kbi'it atu deklarar imunidade. Baze Konstitucionalidade iha artigu 85 (i), katak Prezidente da Repúblika so bele deit fo perdaun ka indultu ou halo redusaun pena sentensa deit: hanesan estipuladu ona iha artigu 85: *(Kompetênsia Própria/Rasik) Prezidente da Repúblika deit mak bele fo hanesan tuir mai: i) rona tuir governu hodi fo perdaun ka hamenus pena sentensa.*

Maybe, kompetensia husi Prezidente da Repúblika ne'e la'os hanesan razaun ne'ebe loos atu fo amnestia antes kazu krime ne'e rekere ba iha tribunal. Maybe tuir loloos depois de tribunal hamonu pena sentensa ba kazu ruma maka Prezidente da Repúblika bele fo perdaun ou halo redusaun ba pena sentensa, mos antes desizaun ne'e foti husi Prezidente da Repúblika uluk nana'in tenki iha konsultasaun ho parte governu nian.

---

<sup>2</sup> Ibid.

<sup>3</sup> Carolyn Bull, Novembru 2001 iha tradusaun ba Amnestia.

Dahuluk, Prezidente da Repúblika Xanana Gusmão nomos Prezidente da Repúblika actual uza kompetensia ne'ebe mak estipula ona iha artigu 85 hodi hakuran pena sentensa ba sira ne'ebe involve-aan iha kazu krime 1999.

### **(b) Bazeia ba Konstituisaun, Karik Parlamentu Nasional bele fo Amnestia Jeral?**

Bazeia ba iha Konstituisaun Repúblika Demokrátika Timor Leste ne'ebe iha kompetensia atu fo amnestia mak Parlamentu Nasional deit, bazeia ba iha artigu hanesan tuir mai ne'e, 95: *(Kompetensia Parlamentu Nasional Nian) 3. Parlamentu Nasional sei Halo mos (g) Amnestia.*

Mesmu Parlamentu Nasional hetan kompetensia hodi fo amnestia bazeia ba artigu 95.3 (g) Konstituisaun no Prezidente da Repúblika mos hetan kompetensia bazeia ba artigu 85 (i) hodi fo perdaun ka indultu no halo redusaun ba iha pena sentensa, karik artigu hirak ne'ebe refere iha leten direktamente bele uza hodi nune'e ezerse kompetensia hodi fo amnestia ba kazu krime grave 1974 – 1999 ?

Kompetensia tomak ne'ebe fo ba iha Prezidente da Repúblika no Parlamentu Nasional tenki mos bazeia ba iha ou tuir kompetensia sira seluk ne'ebe mos regula ka estipuladu tiha iha konstituisaun. Nune'e iha artigu balun ne'ebe eziste iha konstituisaun mos bandu hodi fo amnestia jeral ba iha atór krime grave iha Timor Leste ne'ebe akontese durante tempu 1974 – 1999.

Artigu sira refere hanesan tuir mai:

Artigu 160 no 163 Konstituisaun

Artigu 160 regula katak *krime grave ne'ebe akontese iha lora 25 de Abril 1974 até 31 de Dezembru 1999 (ne'ebe konsidera nu'udar Krime kontra Humanidade, Genosida, ou Krime Guerra/Funu) tenki prosesa nu'udar krime iha tribunal nasional ka tribunal internasional.*

Artigu 163(1) estipula katak *Juiz iha tribunal nasional ou internasional sei ou bele julga kazu krime grave ne'ebe akontese iha tinan 1974 – 1999 no tenki prosesa to'o kazu ne'e deklarata katak remata.*

Bazeandu ba iha konteudu jeral konstituisaun, maski iha kompetensia konaba sé mak bele fo amnestia, bazeia ba iha artigu 85 ou artigu 95, artigu rua ne'e la bele uza hodi fo amnestia ba kazu krime grave ne'ebe akontese iha tinan 1974 até tinan 1999 bazeia ba iha artigu 160 no artigu 163. Tuir loloos lideransa tomak iha dever ka obrigasaun hodi kumpri ba kompetensia ne'ebe mak iha, ne'ebe mai husi konstituisaun katak tenki akuza kazu krime grave no rekere ba iha tribunal nasional ka ba iha tribunal internasional la'os pelu kontrariu.

Artigu 9 no 23 Konstituisaun

Artigu 9 no 23 Konstituisaun regula katak *bazeia ba iha lei internasional, governu Timor Leste tenki kumpri ba Direitus Humanus.* Iha artigu ne'e mos regula katak sé kuandu Timor Leste assina tiha

no ratifika tiha Lei Internasional, Timor Leste deve-ser hakru'uk ba iha Lei Internasional iha prosesu implementasaun ka aplikasaun ba Lei Nasional.

## **BAZE LEGAL INTERNASIONAL**

Bazeia ba Lei Internasional, Amnestia Jeral ba kazu krime Guerra/funu, krime kontra humanidade, krime ne'ebe hanaran Genosida kontra étniku la hetan lisensa<sup>4</sup>. Ne'e bele hare iha Konvensaun Internasional Direitu Sivil no Politika iha parte II liu-liu iha artigu 3 (a, b, c) no iha parte III artigu 6.3 nomos iha Estatutu Roma ne'ebe Estadu Timor Leste ratifika tiha ona iha loron 6 Setembru 2002 deklarara iha parte II Jurisdisaun, lei ne'e bele adopta no aplika, liu-liu iha artigu 5 konaba Krime ne'ebe inklui iha jurisdisaun tribunal<sup>5</sup>.

Konvensoins Internasional ne'ebe mak ratifika tiha ona bazeia ba Konstituisaun RDTL direktamente implementa nu'udar lei nasional desde konvensoin sira ne'e ratifika husi ita nia estadu hanesan estipula tiha ona iha artigu 9.2 Konstituisaun, no sé iha lei nasional iha prinsipius balun ne'ebe mak la adekuaudu ho prinsipius internasional ne'ebe mak inklui iha konvensoins internasional ne'ebe iha, maka direktamente mos, lei nasional ne'e la vigor, hanesan mos konstituisaun artigu 9.3 regula ona, no iha produsaun leis nasional tomak deve-ser ke refleta ba, sá mak regula tiha ona iha konstituisaun artigu 23 ne'ebe regula katak *"Direitu fundamental sira ne'ebe konsagra iha Lei Inan la hasai direitu seluk-seluk ne'ebe temi iha lei no interpreta sira tuir Deklarasaun Universal Direitus Humanus ninian"*.

Mas seidauk klaru ba JSMP katak regra lei internasional konaba amnestia iha relasaun ho krime funu/Guerra ne'ebe mosu husi konfliktu interna (ho armas). Maybe mos kazu legal konaba tribunal internasional foin lalais ne'ebe akontese iha Jugoslavia haklaru katak krime ne'ebe refere hanesan mos krime internasional nune'e deve-ser hakru'uk ba jurisdisaun universal<sup>6</sup>.

Entaun, kuandu Parlamentu Nasional ka Prezidente da Repúblika utilize ninia kompetensia tomak hodi fo amnestia, mak klaru katak politika ne'e adversariu tiha ona ho Lei Nasional Repúblika Demokrátika Timor Leste ninia liu-liu iha artigu 160 no 163 (1) no Lei Internasional ne'ebe assina no ratifika tiha ona husi estadu Timor Leste nian hanesan Konvensaun Internasional konaba Direitu Sivil no Politika liu-liu iha **Parte II artigu 2 (3), no iha Parte III artigu 3** ne'ebe estipula katak ***"karik iha aksaun hadau ema nia vida moris ne'e hanesan krime genosida no tenki kompriende katak la iha ida mos iha artigu ne'e, ne'ebe fo kompetensia ba estadu sai hanesan parte ida husi konvensaun ne'e, hodi hakuran obligasaun sa ida deit ne'ebe tau hanesan pezu husi regra konaba konvensaun hodi prevene no fo sentensa ba krime genosida"***.

Entaun, klaru katak Timor Leste nu'udar nasaun ne'ebe ratifika tiha ona konvensaun ne'e, deve-ser tau obedese no hakru'uk ba konvensaun refere tanba wainhira Parlamentu Nasional ratifika

---

<sup>4</sup> Lei Internasional, Prof. Dr. F. Sugeng Istanto, SH. Tinan 1998

<sup>5</sup> Instrumentu Internasional *Pokok Pokok Hak Assasi Manusia/penyunting/tradutor*, Adnan Buyung Nasution no A. Patra M. Zen – ed. III., - Jakarta: Fundasaun Obor Indonesia, Fundasaun *Lembaga Bantuan Hukum Indonesia* no Grupu de Traballu Ake Arif, 2006

<sup>6</sup> Haré Carolyn Bull, Novembru 2001 iha tradusaun konaba Amnestia.

Konvensaun ba Direitu Sivil no Politika ne'e direktamente adekuaudu ona ho lei nasional no karik iha lei nasional balun ne'ebe mak adversariu ho prinsipiu universal ne'ebe mak eziste iha konvensaun internasional ne'e klaru katak sei inválidu. Hodi nune'e JSMP bele dehan katak planu atu fo amnestia husi Prezidente da Repúblika klaru katak sei sai hanesan adversariu ho Konstituisaun RDTL, Lei Internasional, Konvensaun Internasional no tanba ne'e ONU sei la bele simu amnestia ba Krime Guerra/funu, Violausaun Direitus Humanos, no Genosida, sá tan ajuda sira hodi kontra tradadu ne'ebe halo tiha entre parte ne'ebe relasionadu.

## **RELATÓRIU CAVR 'CHEGA'**

Relatóriu *Chega*<sup>7</sup> signifika hanesan revelasaun história nakukun Timor Leste durante tinan 24. Iha periodu ne'e Timor Leste hetan hahalok kruel ne'ebe maka'as teb-tebes husi militar Indonezia. Após de independensia, Timor Leste sente presiza atu estabelese história nakukun ne'e hodi hari CAVR nune'e bele revela ka relembra fali sá mak akontese durante okupasaun ne'e nia laran, após de revelasaun verdade ka lialoos ne'e CAVR esforsa-aan hodi bele fo rekomendasoins relasionadu ho akontesimentu ne'ebe Timor Leste sente iha relatóriu ne'ebe hanaran *Chega*.

En jeral relatóriu *Chega* hetan evidensia ka faktus katak, loos duni durante tempu okupasaun ne'e militar Indonezia halo krime kontra humanidade, krime Guerra/funu, no genosida, no halo agresaun. No husi peskiza ne'ebe hetan, komisâriu sira ne'ebe hala'o kna'ar ba CAVR fo rekomendasoins bazeandu ba akuzasaun ne'ebe mai rasik husi vítima no família vítima katak atóres krime durante tinan 1974 – 1999 deve-ser lori ba iha tribunal nasional ka tribunal internasional hanesan sá mak preve tiha ona iha artigu 160 no 163 Konstituisaun RDTL.

## **RELARÓRIU CVA<sup>8</sup> 'PER MEMORIAM AD SPEM'**

JSMP komenta katak relatóriu CVA ne'ebe ho titlu *Per Memoriam Ad Spem* la presiza atu konsidera ho sériu husi partes hotu tanba prosesu estabesementu CVA ne'e la iha baze legal ne'ebe klaru, no somente bazeia deit ba iha hakarak diak husi estadu rua entre Indonezia no Timor Leste rasik ou bele dehan katak orgaun ne'e estabelese bazeia deit ba iha vizaun polítika deit.

Resposta ONU ba rekomendasaun CVA mos hanesan katak tristeza tebes tanba parte rua tantu estadu Indonezia no Timor Leste haka'as-aan atu halakon tiha krime ne'ebe iha ho deit prosesu rekonsiliaun no maski iha relatóriu ne'e mos reforsa katak krime kontra humanidade ne'ebe halo husi militar no sivil indonezia akontese duni maybe tristeza mos tanba CVA somente hetan mandatu atu halo deit mekanismu de traballu ba justisa tranzisaun ne'ebe antes ne'e estabelese tiha ona no revela "Verdade ka Lialoos lkus" konaba responsabilidade institucionalidade ba krime ne'ebe akontese iha Timor Leste. ONU nia resposta ba relatóriu CVA hanesan eskeptiza ka *skeptis* demais ba legalizasaun husi relatóriu ne'e, hanesan mos povu Timor Leste en jeral<sup>9</sup>.

---

<sup>7</sup> Iha lingua Português katak "to'o ona/para ona". *Chega* mak hanesan relatóriu ikus husi CAVR (Comisaun Acolhamento Verdade e Amizade)

<sup>8</sup> CVA katak Comisaun Verdade e Amizade entre Indonezia no Timor Leste

<sup>9</sup> Haré Megan Hirst, "*Meraih Persahabatan, Melepas Kebenaran: Relatóriu Monitorizasaun ba Komisaun Verdade no Amizade Indonezia no Timor Leste*," ICTJ Occasional Paper Series (Janeiru 2008). *Kebenaran yang Belum Berakhir*; Peskiza konaba Relatóriu Komisaun Verdade no Amizade Indonezia no Timor Leste konaba Krime ne'ebe akontese iha tinan 1999 (Marsu 2009)

## **RAZOINS ADVERSARIU BA AMNESTIA JERAL BA ATÓR KRIME HUSI TINAN 1974 - 1999**

JSMP kontra ba planu hodi fo amnestia jeral ba atór krime iha tinan 1974 – 1999 tanba ho razoins tuir mai ne'e:

- a) Fornese amnestia jeral ba atór krime 1974 -1999 ne'ebe tama ona iha klasifikasaun nu'udar krime grave (Krime kontra Humanidade, Krime Guerra/Funu, Genosida no Agresaun) hanesan preskreve ona iha artigu 160 Konstituisaun, klaru katak estadu Timor Leste halo hela promosaun ba estadu impunidade no imunidade la'os nu'udar estadu de direitu demokrátiku ne'ebe estipuladu tiha ona iha Konstituisaun artigu 1 (1) no artigu 2 (2).
- b) Amnestia mos sei hakuran valores legais, tanba klaru katak wainhira iha amnestia mak prosedimentu legal sei la la'o iha estadu no sei la hetan fiar husi povu no dala ruma mos povu sei deskonfia nafatin lala'ok sá mak akontese iha prosesu judisiariu ninian.
- c) Fo garante amnestia ba atór krime iha tinan 1974 – 1999, klaru katak revelasaun verdade ka lialoos durante tempu nakukun ne'ebe Timor Leste passa, ne'ebe mos halo ho sistematizadu no institucional sei konsidera katak nunca akontese. No ne'e sei sai hanesan lohi ka erru publiku ne'ebe boot tanba mundu internasional hatene serteza akontesimentu ne'ebe akontese iha Timor Leste iha momentu ne'eba. Presiza mos hanoin katak wainhira nasaun ida la fo honra ka halakon tiha ninia história rasik, maka sei konsidera hanesan nasaun ida ne'ebe mak "neon mukit".

Karik loos katak Prezidente da República sei fo amnestia ba atór krime grave iha Timor Leste durante tempu 1974 – 1999, Timor Leste sei sai estadu ne'ebe mak la obedese ba iha lei internasional ne'ebe Timor Leste rasik assina no ratifika ona konvensaun internasional balun, no klaru katak sei sai hanesan presentente aat ba estadu ne'ebe mak hanaran-aan estadu de direitu demokrátiku ne'ebe sempre hakru'uk no obedese ba regra legal.

Bazeandu ba lei internasional, Timor Leste iha obrigasaun ka dever atu la fo amnestia ba atór krime grave ne'ebe iha Estatutu Roma artigu 5 ne'ebe regula Jurisdisaun lei internasional ne'ebe tama kategoria krime kontra humanidade, genosida, no krime Guerra/Funu nomos agresaun katak la bele fo amnestia no konstituisaun RDTL mos kontra amnestia ne'e hanesan estipuladu ona iha artigu 160 no 163.

### **Obrigasoins Timor Leste bazeia ba Konvensoins ne'ebe Ratifika Ona**

#### **1. Konvensaun konaba Tortura**

→ Timor Leste deve-ser fo pena sentensa ba aksaun tortura no pena sentensa ne'e tenki adekuaudu ho tipu krime ne'ebe iha.

→ Bele uza mos konvensaun ne'e ba periodu 1974 - 1999

## 2. Lei Internasional Estatutu Roma konaba Tribunal ba Krime Internasional

→ Estadu Timor Leste deve-ser kumpri ninia obirgasoins no hala'o prosesu ba atór krime iha Tribunal Internasional ba kazu krime grave wainhira Tribunal Timor Leste la kohi atu julga kazu krime grave ne'ebe akontese.

→ Bele uza Estatutu Roma ba Krime haat hanesan krime kontra humanidade, Genosida, krime Guerra/Funu, no Agresaun.

→ Timor Leste deve-ser bandu fo amnestia ba genosida no deve-ser fo pena sentensa ba krime refere.

→ Bele uza mos konvensaun ne'e ba periodu 1974 – 1999.

## KONKLUSAUN

Wainhira Prezidente da Repúblika deklara Amnestia Jeral no karik loos, atu ema hotu bele sente justisa ba krime grave tomak, sá mak sei akontese iha futuru ?

No karik wainhira Prezidente da Repúblika deklara katak iha possibilidade, señor Prezidente sei fo perdaun ka indultu ba krime grave iha tempu uluk 1974 – 1999 maka realmente ne'e hanesan legaliza amnestia jeral *de facto* tanba iha possibilidade mos kazu krime grave barak iha tempu uluk ne'e konsidera la útil ona no nunka akontese.

Maybe, tuir JSMP wainhira amnestia jeral ne'e fo dunik, klaru katak desizaun ne'e abertamente pelu kontrariu ho lei no konstituisaun Timor Leste liu-liu artigu 95. 3 (g) no 160, 163 mos artigu 9 nomos 23, no lei internasional e konvensaun internasional ne'ebe mak Timor Leste ratifika ona, liu-liu konvensaun Direitu Sivil no Politika Parte II artigu 2. 3 no Parte III artigu 6. 3, mos Estatutu Roma artigu 5.

Estadu Timor Leste hanesan estadu soberanu deve-ser tane aas prinsipiu estadu de direitu demokrátiku ne'ebe obedese ba lei hanesan estipula ona iha Konstituisaun artigu 1. 1 no artigu 2. 2. JSMP hanoin katak wainhira estadu ida hakarak ema haré hanesan estadu de direitu demokrátiku maka deve-ser ke priense kriteriu hirak tuir mai:

1. Lei deve-ser hanesan Komandante Supremu katak lei deve-ser tane aas no tau iha fatin ne'ebe aas husi interese tomak tantu interese politiku, partidu ka partes balun (*Supremasi Hukum*).
2. Deve-ser iha prosedimentu legal ne'ebe klaru ba kazu tomak sen iha influencia husi partes barak (*system hukum yang jelas dan independent*)
3. Deve-ser iha garantia katak ema tomak hanesan iha lei ninia oin (*Equality before the Law*)
4. Deve-ser iha separasaun poder (*Separation of Power*)

Haré ba iha kriteriu tomak refere iha leten JSMP hanoin katak wainhira lideransa sira husi estadu ka nasaun ida ne'e hakarak atu fo desizaun hanesan atu fo amnestia, uluk nana'in deve-ser fo definisaun klaru, karik desizaun ne'e foti fo mos impaktu ba estadu direitu demokrátiku ne'ebe mak hakru'uk no obedese ba lei ne'ebe iha ka lae ?

Tanba ne'e JSMP komenta katak, fo amnestia sen iha revelasaun verdade ka lialoos sei halakon oportunidade atu estabelese história en jeral, konkreta, no factual konaba akontesimentu tomak ne'ebe akontese durante tempu 1974 -1999 no fo oportunidade mos ba governu e elementu sira seluk hodi halo aat ka rezeita tomak faktus história iha tempu passadu.

JSMP hanoin katak garantia hodi fo amnestia jeral ba atór krime grave durante 1974 -1999, sei fo influencia direktamente ba sistema judisiariu Timor Leste no iha possibilidade hodi sai dezafia ka obstakulu real ba sistema judisiariu Timor Leste, basá amnestia jeral ba atór krime grave, neneik maybe sertu sei bele hasa'e tensaun ódiu ka vingansa social ne'ebe pro amnestia no sira ne'ebe maka anti ba amnestia hodi aproveita pekadu ka krime iha tempu uluk sen iha revelasaun ruma ba verdade ka lialoos.

No presiza hatene katak amnestia ba krime grave samente sai hanesan adversariu deit ba lei nasional ka lei internasional nomos hakuran ka hafraku valores justisa ne'e rasik.

Atu hetan informasaun kle'an kontaktu:  
Roberto da Costa Pacheco  
Koordenador ba Peskizador Juridiku, JSMP  
Diresaun : [bebeto@jsmp.minihub.org](mailto:bebeto@jsmp.minihub.org)  
Landline: 3323883